

靜

廉

齋

詩

集

靜廉齋詩集卷六

仁和金 牲雨叔

約諸君游采石兩爲雨阻戲作奉柬 丙子

牛渚蟠根浮采石鰲頭出海幾千尺從來名勝藉詩傳

江山增重仙人謫前歲初登太白樓恩恩點勘朱墨冊

初涖時受殺風景事至今慙擬縱清游庶湔雪橫江鼓

櫂再三過出不曾停人不泊正如北上避金山俗傳山求名利

者不宜登金山南來又苦歸心迫柏觴時舉聽賓戲勝地不常

眞可惜使君秩滿會當去好景坐看交臂失嗟余老懶

久蹉跎高興頓爲閒義激指麾僮僕戒輿馬莫遣先生

親蠟屐小兒也喜誦沂雩竹籀橫抽試輕策首春鑠印
幸少事五日斜川踵陳迹今宵節飲且安眠明發晨炊
期蓐食炊煙未起雨聲喧箇箇眠中頻反側我非護前
作謾語聊借諧謔寬胸臆不須強出罷虞人且免驟至
驚山賊勸君緩待春泥乾同看翠螺新沐色連朝漸卷
試燈風小庭屢見當頭月中元水府上元游人欲天從
趁佳節爲懲往事苦無寐待覓清娛愁轉結夜深風緊
月還明山行祇怯衣裘薄漏點方沈短夢回依然簷溜
奔春急不知衆客意云何老夫欹枕閒思索得毋水怪
吐雲雨怕我憑高瞰其穴我無犀照窮神姦有亦韜精

肯相偈應是登臨誇得句西抹東塗疥牆壁謫仙灑翰
風雨驚蟬斤不教同李赤故知未足盡君歡所欣尙可
藏吾拙披衣握手一笑粲共笑天公惡作劇偶然着意
便沾滯更欲解嘲無可說後期却恐山靈知辦杳仍就
儒宮謁

是日
行香

瞥見籃輿委道旁竿頭滴瀝如垂泣

游采石壘前韻

游癖難除同轉石春晴逸興騰千尺兒童狂走觸屏障
隔院微聞室人謫勉教奉杖侍先生暫聽拋荒案頭冊
逶迤城北碾晨霜隱約山坳望殘雪短程二十到新河
渡口橫篙舁艇泊拾級還登太白樓詩版鱗攢殊徧迫

蕭生妙手繪名山繚以朱闌勤護惜翠螺講舍闕無人

欲禮雍公遺像失

樓後通翠螺書院卽虞雍公祠

儒生尙解立殊功老

將故應增憤激蛾眉縹緲遠浮青喚客省攜前齒履危

磯高處表然犀

然犀亭在蛾眉亭前

察見淵魚元失策不因當日

騁奇觀那得到今留古跡牽牛飲渚俯天漢熊虎豈容

爭啖食砲臺偃月擬堅城武略周防消反側山椒藉草

喜寬平放眼江天盪胸臆哦詩幾輩足驚人守險有時

能辦賊高高下下繞松磴斜繩懸崖多窘色中元水府

控三元潭洞龍眠抱明月嵌空飛閣倚無地

妙遠閣在
三元洞中

花雨繽紛灑幢節鐘魚海唱谷神膺香縷雲迴蜃氣結

當頭岌岌畏巖顛搖足沄沄愁板薄蟻穿珠透見光明
通津卷葉征帆急窮幽跨險得奇快觀止寧煩更求索
摩肩旋轉塞蝸廬闖首攀緣拔鼠穴支筇庵頂一長嘯
景曠誰令受山偏歸途隨意問精藍啜茗徘徊看題壁
黃山孤塔重登臨殘照吳波魚尾赤茲游共樂素心償
疊韻行吟忘已拙始知勝賞天所靳招邀不比門前劇
今朝縱汝飽探尋前日怨尤徒妄說高齋清讌息勞筋
篆鏤方開趁休謁流行坎止總隨緣却笑無端作歌泣
過香泉不浴爲諸君述游

香泉晚重過霏煙散林阜入浴定奇溫出浴寒侵久平

疴或致疾

香泉一名平疴泉

得喪顧安取況我清淨身水觀了

無垢同人各心戰且復往觀否神瀆涌平地淒風振虛
牖易狎詎難親竟爲湯所誘何生勇過我拍浮如嗜酒
揮弄明月珠意色傲儕偶就深姑就淺斟酌讓諸友濯
纓嗟失路投足亦何有於焉助踵息真水得薪樵陽和
滿大宅雲氣蒸幽藪底須槃礴羸沈浸到肩肘平添腰
腳健勢欲不踈走歸來顧我笑倚壁空袖手我無閉關
心尙有解嘲口不出已神游懦夫還善守

閱滁州志醉翁亭或改爲解醒閣試畢州牧訂游
先作此示之

名流醉亦佳俗物醒亦醜何況醉翁游意本不在酒誰
爲易榜題義必解醒取癡人方說夢竟得獨醒否琅琊
山水勝風雅流傳久我詩無可道強作徒覆瓿但願復
其名已堪附不朽所愧不工書留以俟能手欲去預丁
寧同心有賢守

發泗州

風號雨歇雲陰淒淮壖泥滑如餠飴擔夫薄險鼃鼃跳
估舶重碇鳬鷗棲排空白駮浪頭急隔岸青斂峯眉低
天桃弱柳衍春色不言相對應含悽

白牡丹和顧田在

文龍

孝廉韻

貴客穠華頗倦看若非羣玉見應難
階前弄影嗤紅藥
月底浮光對白盤
剪綵作花憑織素
鍊砂成汞想還丹
六官總覺無顏色
始信霓裳出廣寒

明珠步障倚瑤林
照夜偏宜月有陰
何事更煩妃子染
祇愁兼妬玉人心
錦幃乍卷誰連壁
白髮新添尙一簪
珍重虎頭回妙手
滌除金粉託清吟

清潁書院同胡芟浦

延齡

編修登文昌閣

雙塘新漲通一堤
垂柳碧絳帳開春
風先生玉堂客十
年京洛夢握手鬢
添白道館近牆東
相邀同點屐城闕
倚崇基傑閣竦百
尺三折隱螺旋丹
梯人上慄正似塔

中行扶闕闖然出快哉天宇大千里平如席茫茫村落
靜漠漠雲煙羃遠樹斬而齊浮青鋪薺麥不知日力盡
但覺與天接鑲院兩旬留坐井頗嫌窄茲辰聊騁望陸
海盪胸臆何必借山圍却教增障隔飄然意軒舉欲展
凌霄翼便請示諸生塵襟開偃仄

萬山甘露庵

羣峯莽迴互草樹密於髮緣崖沙路轉裊裊造天闕正
如黃金蛇首貫青玉玦風生土囊口夏景頓蕭瑟清池
涵荇藻一顧解煩暵況有趙州茶宛然甘露滴精藍隱
山脇未到我已悉香殘經卷少閉戶飯筍蕨高枕送輪

跡終身養癡絕癡絕亦復佳此境故難得

端午渡江志喜

晚泊裕溪灣江雲起樓櫓祇愁明日風帶水歸程阻頗
向夢回聽菰蒲響洲渚雞鳴趣長年蚤打迴颿鼓牲醴
亦空陳精誠辦香炷江神警愆祈於我幸無忤三年應
相識一任撇波去是時暎將出峯頂看然炬連山橫紫
翠淨綠映平楚鏡面縠紋微輕漣逐柔艣中流真自在
默坐意飛舞我行才百日倏已屆重午于役本無勞遄
歸亦有取佳節許休沐義乃通今古預想到家時樂事
紛可數祀先捧蒲觴抱孫簪艾虎昨夕恐遲留有語不

敢吐天門今在望轉覺蛾眉嫵扁舟落吾手厥樂誰貽
汝志喜頌神休弦歌宜有譜況從新年來課詩紀行旅
四十缺一篇此作更須補

禽言

割麥插穀勸農并作莫言田家苦但聽鳥聲樂青黃不
接農苦飢天生此鳥喚醒之割了麥插了穀牛在牧場
人在屋可許勞筋暫息無樹頭相勸提壺盧

夏日映春園雜詠

荒畦已復草齊腰開徑還將舊客招苔砌碾來粘屐齒
竹扉推處損藤苗

土龍崛起作之而頭枕南樓尾拂池不向砌邊看石記
那知元是子城基

山畔青蕪箭道平我來無復餓鴟鳴三間水榭涼陰滿
時有穿窗竹筍生

曲池環繞洗心亭新漲光連竹樹青愛煞白鵝供點綴
阿誰來此寫黃庭

美蔭真堪了一生居然風度飾綵纓從來嗤點寒蟬啞
此日還應恨費聲

慈竹新抽瘦比蓬豆苗瓜蔓曲籬通半牆巧疊魚鱗瓦
隔院遙看杏子紅

綠暗紅稀密葉遮枝頭驚茁紫蘭芽園林弄色邀新詠
五月重開木筆花

小院陰陰翠幙圍甘蕉修竹兩因依榮枯總待風霜判
何假彈文說是非

呢喃頻聽繞梁過乳燕翻風似織梭想得尋巢非舊侶
也同傳舍閱人多

蒲團木榻竹交床家具無多供客忙移得虛堂間柱礎
晚來同試石墩涼

天生善祝讓蒲盧笑指兒曹解得無憑仗一枝青鏤管
飛騰元只在須臾

除草

名花種不蕃惡草踐不斃披猖乘夏令迅發暑雨際聞
從窗前看正合殺其勢磨鎌亦安用拔本真得計旁觀
或噴息殊與濂溪異先生粲然笑學古毋乃泥青青初
繞砌芳潤含姿媚露浥淺苔粘風迴落花綴生機欣漸
長穀種護田穉吾豈愛蓮翁於心亦有契今來太滋蔓
無復留蹊隧土膏空耗蠹嘉卉時侵蔽旣苦伏虺蛇還
愁聚蚊蚋有害故當除誰教養荒穢芟削恐非時爲君
數前志不遣殺孩蟲蒐苗仍有制斧斤以時入陰木先
秋刈泥趁水如湯培田利燒薶便欲任榛蕪詎得古人

意吟風弄月時應復變其例伐樹厭遮山除草厭遮地
廓清摧陷力出手聊小試自譽亦自嘲閒中有經濟

六月杪熱甚遣懷

金天藏爽氣火傘駐長景相逢炎官炎誰道冷曹冷水
濁幾蒸湯石頑應煉礦頻見草頭垂祇聽松韻靜連朝
帶久褫暫寢羽還秉嚮晦怯然脂當餐愁說餅茶熟儘
辭爐瓜甘迫沈井熒熒心自煎昏昏目爲瞋年衰防眩
督毒鬱戒疽癰却安滋味淡漸欲杯鐺屏苦趣鐵輪觀
新機浴盤省救喝沸蜩蟬聆呱跳鼃黽煩憂眼前障抑
塞胸中顛空驚雷蚊聚絕望露鶴警倏忽炭銷冰輾轉

形嫌影重尋安樂法不藉汲古綆校文常苦躁停戰適
遭幸案牘減紛繁衣冠謝嚴整琴傳風應薰詩憶雪歌
郢光陰瀟灑送賞會從容領但遣此心忘何妨小年永
縱少樹追涼且喜禾抽穎彈指況秋期舉頭方月炯莫
看雲漢圖佇人廣寒境

喜雨柬朱蓉溪

肇基

太守

季夏水潦昌今茲偶陽亢禾頭少霑潤含秀待催放憚
暑勝遭炊比屋問無恙吾官非守土同患敢相忘鑠院
獨徬徨朝暮青雲仰使君先我憂齋潔靈祠向雪免蒼
鵝冤屏除蠍虎誑直以精誠通辦香氣騰上江雲推礮

車羣龍卷飛浪雷公再三鼓急雨勢彌壯縣延三日足
灑落四郊望已覺翠波旋行看黃雲漲病者固以痊憂
者悉以暢誰能妙迴幹和氣頓蒸釀使君避不有國
慶本神貺曩敢詛風師今應謝雲將有所尋有報斯舉
真大當奉牲宜致胙受福無與讓嗟我竟何功亦忝豚
肩餉歌報東長生聊爲郡人倡

太守餉佛手柑十八枚

黃色黃光寶樹懸兜羅縣手記談禪熏香欲滿三千界
證果元推十八賢未許藏刀將指截正須開掌見珠圓
從今慙愧林菩薩摩頂居然有別傳

看橘蠹化蝶作

蠶蛹旋成蛾橘蠹亦其亞不死不生間夢蝶以時化新
粉帶膏黏遺蛻留圻罅輕風暫披拂頓促羽仙駕何必
返羅浮花叢皆傳舍方超鳳子羣不待蜂媒嫁翩翩尋
舊隱癡種更來下卽此閱輪迴微蟲通晝夜

中秋前夕月下看雨

涼月挂林梢流雲催急雨簷溜映斜光串珠爭媚嫵定
知江介近龍氣偶然聚正使擘青天不掩清虛府長吟
寫奇景響答秋蟲羽却想客心驚連檣隱煙浦

秋日園居雜詠

斧柯芟却樹蒙茸青峭分明露幾峯雨後高亭無客到
心隨雲遠獨支筇

沈吟佳句每神游謝朓青山李白樓

陸魯望句

到此那能勤

著腳恰留一半望中收

樓已兩登山卒未到園亭東望正相對焉

秋禾滿野似披蓑廣陌風傳打稻歌但覺明河常耿耿
較量米價定如何

落英難療夕餐飢老圃秋容澹正宜近泝菊江留菊所
那無佳色到東籬

借葉爲花亦可憐綺霞濃抹雁來天問名聊送衰翁喜
童稚爭誇老少年

半露雞栖風雨侵失時應抱補鳴心秋蟲信有吟秋力
永夜偏能不輟音

能言鵲鴝勝嬌鸚巧囀何須剪舌成短翅跳蕭相對舞
竹闌西畔報新晴

晨興詩課聽琅琅嬌女裁看十歲強未解塗鴉先詠絮
也應不忍負秋光

姪三典未嘗作詩忽和余梭字一律喜其可教疊
前韻示之

巧囀初聽柳外梭不教辜負好春過角犀汝欲超羣從
鬢禿吾今儼一婆但解冥搜穿月窟未妨餘事著詩魔

揮毫頓挾飛鳴勢生子寧容笑蠟螺

姪面黑故戲用易林語

山亭秋望寫懷

林園小搖落開徑旋誅茅蜿蜒平岡起蒼茫遠景包意
行疑度隴目極勝登輶宿霧巾峯頂炊煙帶樹梢樓形
停翥鳳塔勢涌潛蛟複嶂山增堞危巢鳥繫匏一溪徐
引篆萬瓦劃分爻祇覺村墟靜憑將風月嘲偷閒充市
隱理詠記胥鈔兩度重陽接三年再閨交征途牛轉磨
往事箭離梢未足培梧檟纔堪闢葑菱輶軒歸蕩節閭
闔望雲旃黽勉還多負勾留距忍拋秋懷勞吐茹燕坐
試推敲應共題饒客勤來泛菊苞

秋庭翫新月聞南樓讀書聲

三言

秋雲收秋月幽竹柏靜藻荇浮庭悄悄思悠悠砧杵急
絡緯愁稻梁足鴻雁謀隨風葉不繫舟行且止蹇誰留
鬢霜重心繭抽瞻斗柄數更籌嗟我客從我游鎖闌闌
役車休慘將別歲已邁菊觴湛莢囊稠假清讌銷煩憂
青雲志白髮羞繫日繩安可求汲古綆不厭修任蕭瑟
肯夷猶衣添袂燈減油讀書聲在南樓

追和先大兄己未九日見懷韻

悵望風催斷雁高當年佳句誦韓豪依然客裏逢莢節
聊向尊前薦菊醪狹室同居元似陸愁懷責子漫加陶

沈吟舊賦增秋感更擬招魂續楚騷

附原作

黃金臺畔碧雲高老去登臨興不豪千古名流嗤
畫餅幾人詩筆擅題饒班荆漫說悲秋杜對菊真
同贈影陶憶煞淖濱擁書客一聲孤雁最蕭騷

詠牽牛十二韻

蘇氏荒園詠牽牛憶見稱露濡傾翠琰風過點青燈蝶
粉黏將落蜂鬚怯不勝圓荷浮點點嫩蘚帖層層密葉
微含刺柔條暗引繩沿緣俄得力繚繞必同登但解尋
榛約何煩擇木升朽株聊潤飾峻榦亦超騰強展雲藍
袖矜裁淺碧綾含滋秋雨貯斂色曉霞蒸頗有凌霄勢
都無向日能槿籬爭旦暮豆架任依憑

山亭晚憩

目送秋空雁引繩支筇還向小山登雲歸古塢時封頂
日側遙峯半起棲蟲語漸從衰草咽菊蕊應擅晚香稱
官閒轉覺容吾懶暫憩茅亭一枕肱

閏九月五日獨游山亭

蕭瑟梧秋景漸寒青鞋軟襯葉聲乾輸他邱壑層城隔
割取溪山尺幅寬象外儘堪憑目送坐來何假覓心安
遲遲更酌登高酒且試風爐小月團

丙科滿月命名曰蒨

子舍添丁算孫枝見丙科月生先有姊露晚合稱哥

寒生

露節前因戲入莫訝含啼數羣看灌頂摩九秋方遇閏

祝汝壽偏多

賀客且無譁家翁笑口哆榮滋惟象草同輩命名並从草侔儻

實推驂得駿從吾好徵名錫汝嘉譽兒常忍癖不免抱

孫誇

采枸杞子

方春采杞苗夏采葉及花秋深實全摘經冬剝根極終

年恣戕賊作計亦已差買菜任求益何必傷萌芽蕙蒞

足紉佩入藥種頗奢搜尋到皮骨枸杞根名地骨皮盡殺尤可

嗟我爲斟酌取結子眞菁華珊瑚碾圓顆碧玉含倒茄

神工飾寶珥真妃綴繁珎誰封三足鼎煉此九轉砂但
遣入丹府便欲凌蒼霞我貪人間樂未肯置齒牙閒時
供把玩掌握藏仙車取之既有節養之乃無涯靈根久
蟠結夜警聞呬呀不須雲中去長守仙癯家

三俊初學作詩強與何縉華

日珮

王文羽

元瀚兩

生贈別往復依韻示之

二郎霜鬢沈吟日也學支頤更搖膝夢回擬探懷中筆
割裂幾曾窺錦匹諸君脫口協詞律腹蟹裁堪供瓊皓
寒空征鳥凌風疾鴉噪紛紛應不屑我還多事忘藏拙
笑汝連宵徒強聒

疊前韻送歐陽畏存欽暨何王三生北上

津通析木方迎日舟車隨處堪容膝長安爭重子雲筆
蚤識吳門馳練匹楚越謠吟非一律轉九但擬精思蛄
蟬翼俄聞傳響疾襍中修月藏餘屑癡兒漫想鬪工拙
韓陵石外元多聒

瘞龜

池涸剩泥坑寒龜依岸蟄兒童覓鱗鱗搜攬竟殃及縮
殼良足遮發房嗟不活出土怯風刀應同剔肌骨送還
著故處煖氣固已泄補完混沌竅生死那可必得生真
意外死亦反其宅却思尸解人不幸每遭掘仙路倘緣

慳五百慎一劫

浦口馬氏江樓和壁間韻

江樓放眼六朝空
詩思翻應勝地窮
獨客沈吟風景外
浮萍飄轉浪花中
凌雲已覺瞻天近
賞雪偏奇映日紅
時雪中日出莫訝重來難
信宿星回彈指歲幾終

贈宿州牧張軼倫

開士

同年

九尺重瞻玉立身
隋隄握手歎風塵
從教上下三年考
且奉康強八袞親
澤國祇愁成棄地
窮官還恐累疲民
相逢強作開顏笑
別後何心獨飲醇

時餉潞酒

將至兗州先寄郡守李授侯

清時

同年

道源近衍安溪流鯉庭踵武翔瀛洲摩空雁陣頡頏起
桂林杏苑枝相樛中間絲歷二十載而我先後皆陪游
君兄少司馬彤侯清芳前輩新河合開侯濟泰同舉第
癸卯鄉科君又與開侯並以壬戌登第皆余同年也第
五之名得君重於吾臭味忘薰蕕鸛鸞嘯侶戀臺閣霖

雨布澤先方州嘉禾發軔兆嘉瑞初守嘉興東郡更長東諸

侯 翠華頻歲仰臨幸神人震疊兼懷柔 先師林廟

有加禮黼黻鉅典垂鴻猷守臣供頓固常職萬騎飽秣

萌芽抽頒教屬城訓毗晦一紙良比十部優龔黃自合

晉公輔豈直染翰楊班儔我從瞻望一麾出屈指已復

盈九秋風儀日想動神遇美髯漸白還加修去春君始

返京國齊年歡燕我則不我今赴關泗橋度不具賓主
君應羞久別乍逢仍苦別永夕何忍辭淹留頗聞半載
迫行役過家叱馭毋停輶主人少暇客程急相從一飯
聊中休恩恩握手語難了孤館疾吟先寄投明朝測景
踐斯約始悟聚散眞浮漚癡兒尋與計偕至報章倘荷
瓊瑤酬沿途名勝倦游覽却恨不及登南樓

飯銅城驛

欲落不落雪作陰樹影漠漠山沈沈問日早暮那可辨
且就酒壚隨意斟空槽秣罷有餘粒家鷄野雀爭窺尋
眼前攘攘總謀食飲啄豈必分人禽莫將噉齧笑儋父

敗壁頗知留醉吟出門怕看數錢手攔道尙聞招客音

元旦試筆

丁丑

凌寒叩閭闔待漏凜朝正熒熒火城列耿耿玉繩暎未

瞻
黼藻光先祝

慈寧慶班趨東閣後

殿階侍立東閣西臺翰林學士在第三班與內閣學士俱綴大學士

後近日仰天鏡入春旬有五風力曉猶勁仙仗彩雲翻

文明元會盛鏘洋鈞天奏金石應歌詠江湖歸魏闕游

子重溫清雅樂感人心油然而生愛敬禮成應退食轂擊

九衢迸平生戒馳逐頗以懶爲病隨例賀新年亦本尊

尊性其於敵以下期在明朝更歸去趁斜陽斗室油窗

淨端居嘒幽獨南北苦遼寬斯時小兒女想見新妝靚
懷遠久謠吟羸童難短檠

題畫應

皇三子教

正月初六日奉
尚書房

旨入直

香傳薇省紫袍披恰喜珍禽綬帶垂不是羽儀同玉雪
那堪飛占最高枝

題春林得句圖應

皇三子教

芳華露染朝朝新玉驄小步隨香塵天人結習愛綺語
意蘂欲與花爭春如此園亭供憩息自然靈氣蟠胸臆
詩情縹緲本天機目想心游破空得牙籤壓架耽披尋
響答更饒山水音吟酣萬象總飛動軒鶴起舞辭深林

祇慚和曲多寒素雕績正堪同木寓家法常瞻 睿藻
餘試參函蓋乾坤句

輓劉烈婦胡孺人

厄運赤麋逢貞操白璧碎已碎寧復完完節遺孤在遭
逢非不幸同穴笑相對忼慨作歌詩禮宗想圖繪

爲定州牧毛友桐

覽輝

題伏生授經圖

尙書尊古文祕寶探孔壁今文導潛源伏氏亦藏密時
清重蒐討碩果不遭食難將蒲輪聘姑遣智囊出傳言
憑女子河內讓先得披圖講堂開几杖儼陳列齊語老
來訛音義轉信屈掌故信奇材求道殊怫悅畫師解此

意自足傲摩詰

摩詰有圖宋時收藏內府見中興館閣續錄

遺經脫秦厄光

耀擬星日後人資印本比屋童蒙習豈知藝苑荒在昔

勤墾闢卽此想艱難特有表微力毛公衍詩派兼綜夏

侯說漢廷延博士便欲據重席循良冠三輔雅化本儒

術柱下誦訃謨

子紹睿御史

唐虞待熙績積慶自傳經丹青

留古色

和前輩任處泉

應烈

太守快閣四首韻

放翁快閣遺址已不

可尋君附近起屋顏以舊名

爪跡聊尋雪上鴻肯將轉轂擬驚蓬閒憑快閣凌塵外
靜挹澂湖俯鑑空詩卷已看傳驥子釣竿應許伴漁翁

東臯種秫輸租了酒直無煩賣老驄

底須沖舉慕仙乎福地逍遙且自娛
句好總教題漫興老來偏喜號狂夫
誰言石隱同黃綺蚤識風流比白蘇
試擬放翁團扇畫笑君太少白髭鬚

三徑長開埽綠錢每邀花伴鬪輕便
裁臨曲水供浮白恰趁樵風助引船
勝地從容隨杖履達觀變滅等雲煙

爲君檢得桐鄉例他日南陽定有阡

君以南陽守假歸來書謂需和章以

代墓誌故戲及之

當年江上訪吟窩卅載分張柰老何
爲羨故山棲託好

翻憐舊雨感懷多

同學十八人今適存其半

忘形久似驪黃馬辨味

還知黑白鵝却想雲龍重追逐憑衿虛檻聽高歌

題葛山司寇觀海圖

六言

扶木天雞催唱谷王丹鼎初開六合清新如許振衣千仞誰來

蚤歲讀書僧舍龍宮海藏窮探應有驪珠獨得眼前妙悟憑參

乍望蓬萊清淺只愁風引船歸一自六鼇連釣鄉夢還依舊磯

靜看翔陽逸駭此景人間少雙不數并吞雲夢正慙同吸西江

壬申同使江右

題香雪讀書圖應 皇四子敎

梅雪喜雙清寒香沁靈府平添讀書興金石擬傾吐
帝子暫逍遙瑤光映元圃縱日趁三餘排籤紬四部自
有地爐溫却航磐石古襟情本超曠凜冽等和煦意得
每長吟何假冥搜苦玉宇淨無塵瓊姿增媚嫵聲律應
宮商枝頭翔翠羽誰能寫高韻更聽冰絃鼓

重寓澄懷園雨後聞蟲吟作

霧雨氣蒸濕密樹風初寧蟲吟在高處一絢抽緯經如
聞故人語企脚虛檻聽回頭十七載漂轉餘粘萍勝地
尙如昨疊石辭山庭危樓剩修架朽杓倚迴汀芳蓮舊

遺種蒲稗欺伶仃魚戲乃無路荒穢徒蛇腥當時曲房
掩側想蛾眉青今看宛村落比屋荆扉扃重來慨興廢
挂衣無故釘下直檢書帙欲讀聲還停惟蟲獨何樂清
響長泠泠得毋矜羽化託迹超塵冥吾生本逆旅苑枯
隨所丁一枝聊可借外物須忘形

送葛山歸養漳浦

八閩俯兩浙霄壤不可齊而我與先生共躡青雲梯豈
惟道山隱相逐文衡提譬彼大海水傍渚測以蠡豫章
無凡材繩墨擬精審餘事唱酬多揮毫或停飲竊效從
公歌頗聞將母諗 恩綸方疊拜心迫口爲噤萍蹤時

聚散六載占階莫聯行依瑣闥待漏趨璇扃恂恂觀齒
冒亶亶聽談經不圖數晨夕乃在承明庭長懷烏烏私
方寸自含吐積誠應有感造次不敢剖天高聽則卑孝
治萬方溥矧茲股肱列旁燭寧弗睹幾暇偶獨對稽首
因陳情

至尊惜其去推恩憫所生躊躇動容色曰俞汝徐行一
朝竟得請乍聽使我驚驚喜旋致賀賀畢更黯然黯然
者其私暢然者其天云胡意慘阻何日重周旋復何所
欣悅忠孝羨兩全汎汎潞河船片帆通淞水君行幾時
過心旌我先指我從廿載來松楸夢中倚無復老萊衣

衣繡徒爲耳君今仙霞去飛翠見九峯峯前認親舍白
雲方逢逢只疑雲來近穿雲已千重陟屺忽焉至喜氣
晴嵐濃八座間起居孫曾繞堂下鶴髮仰慈顏熙怡浮
玉笋閒居與南陔妙筆難兼寫懸揣尙神移況乃身親
者羣公盛祖餞分體爲歌詩平生倦酬應東管常不吹
性情增感激選韻仍忘疲綴之章江詠吟想無終期

自白河澗上南天門出古北口

雜言

南白河北白河山澗詰曲盤修蛇聯鑣方軌無不可百
輜填噎當如何土囊張口定須嚙其柰腸中千百轉幸
出幽谷登天門天門咫尺如可捫豈知宜上不宜下失

勢一落吁可怕解我驂挾我輶莫遣我車如水流邐迤
縮衄縋平地顧看來者懍懍欲墮懸崖頭偷閒拾級覽
形勢洛迦仙境標空界未能放眼出山圍茗椀且嘗甘
露味度天南趨古北平川奔放何超忽關口鎖山仍偏
仄攀躋分寸緣雲上魚到龍門迴急浪馬蹄踏鐵苦爬
沙前輓後推徒涸强莫嫌騰上轉紆遲却恐臨高不自
持到來正與天門異卽此殊堪悟平陂進無艱阻退偏
難上極崎嶇下差易一日程三險聚卓帳投牀氣如縷
但慶天公少陰雨僕夫偶語驟張皇明日還經青石梁
青石梁雖未到險勢卽今能逆料地險豈難踰何堪輶

重俱乘危鬪輕捷宜騎去不宜車病夫骨碎車中臥蹶
起試看鞭馬過

星龕巖廢寺

停車安野宿卓帳傍星龕賸有登高興

時重陽後一日聊憑濟

勝探翠微迴曲徑黃葉點精藍石泐香臺淺苔封佛髻
鬢經亡誰演唄鐘徒不聞鐺梵宇行將圯形家或早諳
臨崖空峻削闢地少苞含僅可孤亭稱元非傑閣堪河
流弓脫檠去山勢馬驚驂行殿方移駐僧寮豈久耽參
禪殊寂寞覓句轉清酣却笑凌千仞誰能臥一庵

入直太蚤口占

羽林虎睡正縱橫
雲幄低垂障月明
却笑老儒趨直蚤
乾清門下聽鐘聲

靜廉齋詩集卷六終

靜廉齋詩集卷七

仁和金 牲雨叔

正月十六日 正大光明殿侍宴恭和

御製上元後一日小宴廷臣元韻 戊寅

上元嘉宴續芳辰月馭還停七寶輪仙樂鏘洋韶濩奏
華筵稠疊海山珍欣逢寰宇登三日記到鈞天第一巡
聖澤久霑中外徧却因賡韻愧征人

是日又擬撰西山積雪禁體聯句初命赴同樂園
後改就 正大光明殿宴罷 恩賜官絢二端瀛
臺聯句石刻一卷雕牙香盤齋戒牌各一面磁板
指一枚上有篆書 御製詩砂壺一把申刻拜
賜出官仍 命赴西廡子看煙
火重 賜果盒元宵月高始退

少司馬程莘田

景伊

前輩雲塘課耕圖

吾聞叱牛勞遠遜讀書樂髯翁大人相寄興乃耕穫將
毋治生急百畝趁東作應知古農正歲歲戒錢鎛曾孫
或觀稼饁饌每交錯小簇幽風圖此景故不惡顧我客
新安山谿驚岵嶸雲塘在何許疆畝殊開拓東坡寓毗
陵乍踐江水約遷居就膏壤自可勤芟柞鰕生敢輕量
姑以己意度田廬同畫餅豪素欣有託正恐清卿家依
然空負郭萬石有時收二頃竟何獲試舉問先生按圖
寧可索先生掀髯笑且作屠門嚼

預題廬紹弓

文昭

編修檢書圖

古人寫書辨魚虎近代鹵莽隨雕鏤誤書思之亦殊適
此殆漫語不必售以文害辭辭害志落葉那堪常打頭
平生頗喜正文字管闢難指天星稠倘逢佳友對佳本
晨夕辦香禱祀求盧郎溫潤乃如玉獨有校勘嚴仇讎
目勞手倦苦相角授經餘力閒須偷矧當退食百城擁
縱橫穿穴資旁搜尋蹤宛轉蛇赴壑得雋掣曳魚銜鉤
後先左證每連逮新舊逋責期畢收時時堆案礙雙肘
正似獺祭陳沙洲寫真擬作此圖好真景何待圖成留
諸公同直總親見羨君勤敏爭歌謳君勤轉足長我情
佇看卒業容借籌憑君耕穫我竊享計較勞逸誰爲優

傳神更勿取形似安知君是我則不

李廉衣

中簡

編修秋江放舟圖

君家臨趙北煙水如江南懷人動長嘯放艇踰飛驒乘
風出瓜步秋影晴空涵潮聲喜初歇夾岸排瑤簪孤標
竦浮玉砥柱中流堪騰波趨鐵甕哆口遙咀含夷猶姑
緩棹好景無嫌貪岷峨距滄海萬里須窮探金陵望采
石咫尺何足耽徒因謫仙重風月供清酣半江俄剪取
倒窺淩蔚藍芙蓉況可採露下餘香馥沈吟欲持贈佳
句盈驪頷斯游追古昔俯仰通英談吳儂成北客川路
忘前諳披圖對明鏡祇益塵容慚何當返田舍一葦浮

層潭遲君重訪舊埽我荒徑三

爲少宗伯介受茲

福

前輩題太常仙蝶圖

蝶有三棲寺門

上每壇廟祭祀輒翔集其處若巡視然署官舉扇呼老道瞥然而下環視不驚機心少動逝矣翅僅踰寸而飄忽勁捷燕雀顧反避之不知始自何時老隸言祖父卽見有此

太常有仙蝶寓形過百年莊周三生夢幻影常差肩無
心戀芳圃有意隨祠官明禋通肸鬻得氣馨香宣居然
率其職巡歷環郊壇含靈解人語扇舉供擎看機心隱
相迂決起俄翩翩文采乃不豔甘讓羅浮先豈知真鳳
子混跡禽蟲間燕雀不敢啁來往殊安閒夙沾禮樂化
自足調鷹鷂當塗騁輕薄對此應慚顏滕王妙圖繪逸

品還空前司宗補其闕掌故千秋傳

澄懷園銷夏四首疊映春園韻示三吾三俊

銷夏依然傍碧灣
馴禽相識語間關
搜林漸減千章木
帖石誰添四面山
賸有閒庭開鹿柴
且同逆旅繫雕斑
栽蘆當竹猶堪玩
荒徑休芟帶露菅

憑教熱客款朱扉
容我當風晾葛衣
退直步衝殘雨過
望城心逐暮雲歸
枕邊幸有蝶相引
瓜上都無蠅可揮
解得避人方避暑
柳陰閒却舊漁磯

一局惟應國手宜
深機寧耐着前推
較量早晚花磚在
占驗陰晴柱礎知
負子有情空祝蝶
衛身少智遠慚葵

閉門覓句真良策省事清心兩得之

連朝減課日初斜

起伏起出伏止

香篆還看繞帳紗自欲解衣

非作畫不緣消渴鎮煎茶招涼已假搏風翼踏月疑乘
上漢槎蕭爽應知眠食好莫將肥瘦辨熊蛙

題同年張有堂

泰開

銀臺樂全小照

人生至樂誰能全古稱性也有命焉輟耕隴上慕富貴
富貴更想歸田園田園造次不可得幻景乞靈憑筆墨
騰身未解向圖游空色真堪供眼食卷圖笑語樂全翁
一枝何必求旁通備嘗衆樂樂云極翻恐日力常怱怱
不如添我著圖裏樂事平分隨料理閒時勝與野農譚

一老風流差足擬

自題桐竹淨居圖

莫道溪山選勝來
試聽風樹有餘哀
龍門嶰谷何煩擬
苴杖根連削杖材

家傳白業透禪局
慚愧林邊認祖庭
示現蒲團常宴坐
心持佛說報恩經

和友瑁周迴川

助瀾

廣文學舍種梅韻

西溪舊隱香海中
長安索米慚塵容
却從庾嶺探春信
甲子梅生頻喜他鄉逢
醉翁亭畔見手植
丙子雨笠欹
粵東側殊恩恩誰能
離落伴疎影聊向
盆盎尋芳蹤閒情試

擬廣平賦徧栽空想林逋風衡齋

迴川別號

好客少羶坐韻

事誇我傳詩筒姚江學舍足桃李羅浮清夢迷西東孤
山悵望隔煙浦雪肌妬白酒暈紅茅簷待索故人笑縞
袂旋趁扁舟篷同來祇少出林鶴種就不減移山公百
花頭上占高格和羹事業歸儒宮殘英飄灑寫玉笛老
榦蟠屈淩孤桐莫耽春意翦刻好應識化雨滋培功他
年詩客訪故事苔鬚漸滿垂新茸盤餐破例屏苜蓿金
尊送煖忘嚴冬何時與子共追賞相思一夜吟雲龍

奉題

皇五子蓮湖泛舟圖和

皇四子韻

澱湖遠鏡通昆明芙蓉覆水華藏盈如聞

帝子北渚

降恰上太乙蓮舟行綠楊陰裏繚隄曲赤闌橋外屏山
橫不須坐待晚色淨正喜侵曉香風輕一莖秀出總娟
妙況有萬柄低昂迎蘭橈未忍撇波去雲錦機上龍梭
停浩歌遙應采菱調淥水擬奏琴清英投竿宛轉傷孤
嶼點屐縹緲凌高亭華林頓有濠濮想靜觀自得諸趣
生環游千里引魚戲傾蓋一宿尋鷗盟受經餘暇足瀟
灑眼界開滌天機清集裳何必效楚客吟風弄月同襟
情篷窗賦就意飛動

皇五子有蓮湖泛舟賦想見毫端珠露增

正月十九日恭和

御製燕九日作元韻

己卯

仙蹤縹緲逐鴻鸞勝地熙春盡日喧恰喜收燈餘令節
應從傳火契微言 恩華煥發星雲象 睿藻榮霑翰
墨痕佳景卽看騰城外從東天馬鎮來宛

是日 命至 南書房同諸臣擬撰燕九日聯句至
晚仍 命往西廠子看煙火 恩賜茶酒果盒元宵

倪敬堂 承寬 少僕招同人小集近光樓分韻得橋

字

山樓鬱起何亭茗曲池初泮通雙橋頻年夢想清閼閣
首春兩度勤招邀高談殊駭隔離聽巨觥不待壘塊澆
探籌意取肅觴政里胥那肯均丁徭終然一笑飲而俟
瞥見往往增譁囂儘教把臂混裘屐豈識列坐圍金貂

帶經辛苦暫瀟灑同人牽拂應逍遙嬉春酒燕惜已蚤
風枝颭影空刁刁酒闌別有後期訂諸公尙擬消寒消
故知噉蔗入佳境開筵漸覺風光韶琳瑯滿壁助酣暢
卜居清曠聞長謠黃門遺筆興不淺水蓮同調還分鑣
風流二老典型在曾記對舉常三蕉敬堂錄尊甫穉疇
給諫嘉話一則與
汪水蓮先生法書同懸壁間二公皆先大兄執友
余少時並常追隨倪旣通顯汪竟不遇對此慨然

聞毓寅殤寄示三吾

衰年已恨抱孫遲願汝何堪失兩兒

兩科以丁丑
殤於鎮江

書去

始知都掩泣歸來猶想爲含飴好憑羊祜前生識重引
龍門半死枝愛子正須遙念我莫添愁疾悔難追

詛黑龍神用東坡下山龍洞禱晴韻

龍靈實昭昭同階羞黽鼃潛潭叨秩祀宣澤裨 皇家
至尊躬禱雨芝蓋淩谿衍慵眠應奮迅雲縷隨香花云
胡久伏蟄正如盤鏡蛇天公誅失職尅日驅雷車窮搜
九地底電影翻金鴉轉禍仍致福作霖惟汝嘉汝聽良
不聰尙聞天鼓搥毋因屯膏故委蛻沈泥沙吉凶神理
信寧待刑犬殺吾詩擬飛檄霄路迎衙衙

熱河寓舍代書示兒

僦居裁斗室有炕轉局促跼壁枕難安容頭還露足其
旁賸隙地堪架行牀宿有櫃擬人長橫據實其腹鑄鐵

聚堅頑千斤計羸縮惜無點金術客主快分蓄呼奴學
運甓流汗走相屬傾倒重安排拓地乃殊速居然幃幙
張衾稠穩離襪此炕肯虛懸矮几放伸腳臨窗踞高座
亦頗壯瞻矚窗櫺碎風刀蛛網補空幅蚤知紙價貴攜
取不煩索但惜紙無多周遮逮羣僕轉念不足憐倚酒
忘衣薄吾廬旣完密次第謀飲啄天廚飽餐歸不飲稍
寂寞肥牛有芳腓聞自楚辭讀晚食每如拳乾醉酒名兩
甌沃欹帽意微醺退直頗云樂性僻尠過從客至亦辭
覆何物可消閒恨未挈書簾 宸章遣賡和對月閃螢
燭絡緯助抽思吟聲相間作詩成書細楷腕指強去於

木小硯舊隨身無端忽拋落借用非所便平筆墨苦膠
著手僵眼尤暗雲霧少澄廓強半比書空驚心檢譌錯
假日喜從容不然窘方朔閒房做晴晝幸免風沙撲却
愁撐野幕晷短繼以燭際此復操觚將毋等矐目預爲
他日慮祇益情懷惡眼耳葆神明老境定不確冥然置
勿道且省額紋蹙此行匪艱苦此老況落拓精神養逾
勝仍未廢丸藥前途或恩遽寧免斷還續得此亦復佳
少之良不覺老夫彌恃壯小子應駭愕豈知真實語同
輩總推服內養竟何憑并語汝其略平生怕講學科律
哂空錄卽此素位行見解已不俗汝曹尙深體常念平

爲福前時需泥困遠聽疑漂泊傳說豈無因增飾供咀
嚼向使實有之吾身嗟莫贖那得爲此詩莊語雜諧謔

八月二十七日額爾楚克哈達奉

旨侍宴恭紀

卽事方思詠鹿茸需雲含潤引龍旌已看蕃部華筵進

廿五日蒙古諸部
於巴彥滿進宴

旋慶帷宮法酒行角觥爭奇仍武備

飯罷

俳優獻笑總民情

戲演中城兵馬司
審賭博打降事

拜恩更

憶車攻什未錫珍庖祇取盈

詠樺木奉和 皇四子 皇五子韻

遙看瓊樹一枝長那得封條雪異常皮韌蚤知材勝革

膚完猶喜白踰楊燭心顧影時爭寸鈔庫傾貲不計張
大用正宜修武備筋膠作伴貯弓囊

斫白將無認馬陵霜皮得氣本陰凝梭披犀甲應同壽
松蛻龍鱗定幾層嶺半遙分如有月帳前闇識不須燈
莫憂資象常遭剝剝盡重生悟未曾

詠羊腸河奉和 皇四子 皇五子韻

詰曲纔容一葦橫絕勝尋脈聽駝鳴平沙共喜羶堪藉
狼石渾疑角可撐草掩夕來歧路失綆長朝飲在山清
空傳地險羊腸坂對此偏多潤物情

兌澤爲羊易象傳迴腸九折演靈泉盤紆似繞川原伏

膏液長資汲飲便掘井不須徵變怪縣獐猶記挹清漣
試聽入夜爭餘瀝滿腹真應比慕羶

玲瓏山

蒙古名僧機圖謂窟寵也查夏重山莊雜詠自注云達陰嶺東北四十餘里山巔巨

石百餘丈中通一門望若龍橋蒙古謂之生吉兔奉旨改名玲瓏山

螺髻盤雲訝鑿空遙看塔頂佛龕同繫舟應出千峯上
擘華裁容一指通水激飛輪明月峽天窺倒影洞霄宮
堯年肇錫玲瓏號萬竅都藏宛委中

獲子母虎

獼禽須服猛乳虎正眈眈莫倚生風嘯能禁人穴探賞

功兼狗半

漢制獲熊虎者賞千錢其狗半之謂其子也

占獲勝狐三

一子與母俱斃

生獲其二焉 偃武包戎器偏宜長短參

九日碩籠哈達奉

旨侍宴恭紀

秋籬今朝正解嚴萸觴仍喜 渥恩霑筵開蕃落名王

集優笑詞林故事添

戲演宋時御試翰林實以近事嘲笑

戲馬臺空慙雅

製飛龍殿近傷重檐從來勝地登高酒可似鈞天吉夢

占

哭姊 己卯十二月初四日歿 庚辰

久矣無兄弟遙憐老姊存七旬方設悅千里遽招魂祇
覺除喪急何曾煮粥煩謝庭觴詠趣舊事與誰論

送少司馬觀補亭保前輩典浙試奉和 皇五子

韻

武庫斂鑰文衡操清心鳴鏑聞離鞘觀濤宿願寄兩浙
旌竿難結隨風旂使星一夕指吳越西湖未到先神交
黃梅況值新雨足炎天可怕凌颶颶和聲鳴盛有嘉應
歸昌奇律傳桐巢東南竹箭本方貢春卿早拔連茹茅
上科介少從來霧雨留隱豹仍待雷霆驅懶蛟澤官迭
宗伯往

啓示正鵠釋棚定見無遺鶻粉紅每被老成笑陳橋未

妨輕薄嘲昨年京兆仰冰鑑

上科典順天試

瘦骨一一銅聲敲

阿房肯許薦杜牧溧水自能收孟郊此行徧採到葑菲

敗將不教嗤碣礪別裁僞體更首重清真雅正 天旨

包諸公贈言競藻飾醜面獨愧靈光巔莫嫌不疊上番

韻

諸公多疊送介公韻

新尊愁配重烝穀湖山地主類相避

同直浙人

五膠杯錯落依堂坳

奉輓

皇三子

七月十六日薨

虎幃三載侍談經笙鶴旋迎 帝子靈秋塞分鑣驚昨

夢

去秋木蘭奉先回有詩留別

旨

春林得句憶同聽

嘗以春林得句小照屬題擬

傳璫式刊元石應識珠庭冠列星軫慟

天慈延棣萼那堪肄業誦原鵠

九日同何縉華程旣培

烈

吳肇斐

居澳

及三吾三

後城南登高歸飲靜廉齋分體紀游得五古九首

秋獮輟從役休澣仍閒曹重陽少風雨隨例還登高同
游意飛動正如鷹掣條城南踏陳跡翹首陶然陶

虛亭足清眺豪客蚤張幕催我入青雲聯翩倚高閣三
門金城壯雙塢玉峯削側想市朝喧聊隨鳥鳥樂

避喧非興盡選勝重探幽城陰通曲徑披雪蘆花洲江
湖乍生日遠思託近游水木喜明瑟靈境開龍湫

曾聞龍所官鼓腹致雷雨百步響蓁蓁層潭眞水府寧
知投壺客命中此決賭燒尾應有期誰爲薦清醕

醉客顧我笑登高詎臨深還過黑窯殿
不丁凌嶽岑何年陸渾火僅餘墨突黔
太息夕陽下風傳鐘磬音

縹緲聽仙音徘徊尋古觀羽客禮三清
儼然依玉案如何攻皮工偈處聚腥爛
遺蛻委塵埃應知本同貫

元門參妙理已愜逍遙游惜無麴生榼
藉草憑淹留吾廬幸咫尺聊可歸而謀
盤餐隨意具頓解空尊愁

無酒不成歡無詩能免罰分體鬪新裁
吾亦補其闕采菊與題餽陳言剗株檠
絕境想奇逢去年當此月

去秋度重九乃在達巴汗排雲趨帳殿
廣樂鈞天觀鈞天恍如夢彈指重迎
鑾此日且蕭散短述誇吟壇

承 皇四子寵示塞外見懷之作依韻賦謝

風迴北渚動羈愁賓雁行稀阻勁秋
遶句忽傳思遠道買書恰喜覓新讎
經帷謬演支離說蓬梗聊同汗漫游
幸借鴻篇參水觀那知無地起層樓

附原作

極日長天起暮愁講帷說餅記中秋
空林逐鹿紛馳突高閣攤書自校讎
杖履俄經連夜夢雲山猶是去年游
寸心爭得隨明月直到君家水觀樓

奉謝 皇四子餉鹿脯

昨歲裁賡哨鹿詩今秋還屆獮禽時
偶因番直停前馬今歲請點隨圍奉
旨嗣後自分三班輪去臣姓應以壬午年行
側想參連準麗龜束脯似沾乾豆餒
割鮮不羨羽林隨盤餐頓爾添珍味
客

到何煩算術知

戲疊讎字演成六首意無所主押韻而已奉呈

皇四子博笑

忙中日月不禁愁暫放閒身度九秋無酒可賒聊省債
有書未校肯忘讎交情乍嘅蕭朱隙賞會還尋支許游
小坐好隨牀上下底須百尺踞高樓

嬉春頗復引春秋但欲看花直到秋氣盛雨雲供反覆
鼎然冰炭易恩讎相逢是處堪乘興歸去何緣請絕游
記得古來西笑客閒中頻上望京樓

底事言愁便欲愁祇嫌皮裏寄陽秋買山儘遣譏充隱

清風別集 卷一
蓄劒徒勞借報讎善祝螟蛉猶可負忘機鷗鳥自從游
居鄰東海看來熟蜃氣還應恥化樓

能忘舊事減新愁時序平分怯廩秋拋却鉅釣魚自樂
埽空遺粒蟻何讎胸中城府都冰釋眼底雲山足臥游
到處逢迎相煖熱高寒寧怕倚瑤樓

天和盎盎本無愁春氣應知迴勝秋豈有藥籠偏聚毒
但除碁劫莫尋讎樞機自得環中應放浪何殊物外游
老去幾時能逸我三層試起聽松樓

學步常懷惜景愁誤人空說大春秋將壇始築誰知信
易義分傳合問讎他日擬尋中散曲此來辜負上清游

攤書乍覺涼宵永蓮漏頻催月過樓

大宗伯陳月溪

惠華

先生招同人小集

辛巳

顛風攪空吼痛飲從吾師吾師乃不飲愛觀客所爲盤
餐聞宿戒珍膳靳弗施且將果核餌八簋來遲遲渴羌
故易制微極乘飢疲引滿輒微醉狂興不可支觴政有
成例僉曰藏花宜前宵被花惱展轉根株披當筵旋翦
刻庶以杜其蠟張軍分左右儼樹大將旗我曹偏裨耳
距足關成虧居然列七覆猶欲出一奇老謀方熟視意
突已中之同歡助絕叫激怒形慙詞報復亦時有得少
失可追自咎復自慰相屬還相嗤壁觀漸斂手憤兵應

載馳豈期莫余毒喪雄甘守雌不中竟遠逝妙矣空空
兒諧謔旣酣暢尊俎殊淋漓不須計勝負但請修威儀
惟吾太邱範莫窺玉色移定知醒勝醉醉者或不知肅
揖謝公去獵獵襟袖欹公還試檢點炊飯忘著筭

大廷尉王晉川

會汾

前輩招同人小集

狂飲連日慚謹譁不飲却恨空歸家王公善解鄙人意
繞座彈指稱蘭闥我曹豈待折簡致獨愧未至遭掄擲
頗聞昨夕一卮漏殊喜今朝三爵加盤餐往往出新意
箸所未及口已哆重徵舊令兩決賭盆下捷探縮殼蝸
觸機誰許乍掣搦失勢但聽頻呼呀城濮之戰報在邲

一彼一此原無差中間雜沓變拇陣攻堅弗克圖攻瑕
多方眩誘了不應自擣山定胡爲耶梓中諫果入懷袖
此時解困爭點茶酒龍壁上醉方吐不去得毋愁攫拏
從來卜晝未卜夜莫將燈火驚林鴉降階捧手謝賢主
風流觴詠歸瑯琊形骸放浪詎如許外雖歡笑中應嗟
儻能草序示規正妙蹟還繼蘭亭誇

野園看海棠作

昨歲野園游預訂海棠約今春主人出巢燕守空屋花
事惜闌珊名姝掩脂盃東風偏料峭巧作養花局留待
主人歸燕玉半含璞相逢方勞去苦矜衒蚤邀酌側聽

頗然疑羣疑非我獨穀雨綠添肥夏景如可掬苔茸粘
屐齒殊少殘英落迴廊通別院照眼紅雲簇敢學海棠
顛心神斗加肅盤餐特真率把琰意不屬布席任欹斜
但取對花足低垂拂窗櫺高竦過簷角徧撒芙蓉砂密
綴火珠絡丹的暎酥融酒暈透肌粟施朱兼著粉深淺
不隨俗穠豔故無雙天姿轉清淑偶見翠眉顰笑靨仍
含謔旖旎似承迎臨風欣有託狂來擬神遇繞樹舉觴
沃唐突想頰顏精采踰膏沐定知少良會開謝總寂寞
前夕歎聲微主人應不覺攀折信堪憐繁枝不嫌削茅
齋助清供如有餘香馥紀勝可無詩少陵先筆閣知音

良有待補闕得蘇陸嗟我獨何人自甘噴尾續藏拙正
無難誰寫野園樂

西花園感舊奉和 皇四子韻

過隙光陰催野馬辜負細旃陳廣廈茫茫北渚動離愁
何減清歌聞子野空庭鳥跡縈蒼苔花事飄殘笛裏梅
聚篠縱橫穿壁砌雲根欹側倚牆隈飽書蠹走廚空閉
當戶蛛懸網交綴應劉遺筆牘猶存屈蟠紅印黃塵翳
問疾前年記近游山池蕭瑟早驚秋藥裏經營常草草
講帷消息鎮悠悠遙空笙鶴披雲下青春受謝悲長夜
南皮射獵少聯鑣西園飛蓋餘精舍山邱華屋總神依

壘唱何因引和簾收拾詩篇憑愛弟沈吟哀輓寄遐思
應知聚散真如夢駿驅莫待臨崖控和平養福過千春
便誦鵠原爲誰慟更從連氣忘分形金石猶能協律鳴
休道參商忌相見久聞芝蕙戀同生長川閱水滔滔去
韶景迴看未遲暮請從秋實效箴規敢擬青天撥雲霧

題商喜貢獅圖應 皇四子教

有麟尙說麕而角師子晚出尤不經狡狴白澤總疑似
畫圖隨意留真形軼材之獸每殊狀威猛憑陵熊虎上
世無博物強名獅好奇頗被蕃戎誑貢獅圖署臣商喜
如虎如貓方弭耳頸毛卷縷作螺旋指爪藏鈎蹙花蘂

蠻奴鐵索左右牽左光照右眼語傳據地驕犍乍前却
獅蠻擾狎忘猜悃祇恐野心終伺怠雙睛未到意偏在
透空騰擲輾雷霆更有千奴同一醞我作此語非深文
畫師寫得真精神其間樹石盡古健至今采色彌鮮新
聖朝端不貴異物方貢肯教蒐月窟威音獅吼證旁行
仁化麟振啓長發

奉和 皇四子移居西花園四首韻

每見移居怕索詩園林覓句境偏宜攤書總對文章樹

浴佛先臨功德池

時四月七日

靜裏相關唯鳥語閒中獨樂

有魚知長隄露草晞陽候講席無嫌我到遲

花萼期堅松柏心
林風湖月共憑襟
平分四序推遷速
少別千年感慨深
短景已看駒過隙
和聲還聽鶴鳴陰
不須陶寫煩絲竹
羣季爭聯大雅吟

原作感懷

皇三子

濠濮心情喜自由
夢回春草記同游

與皇六子所居接近

苔分

淺綠通三徑
山送遙青過一樓
柳陌蚤餘盤馬地
蓮塘新聚釣魚舟
應知飛蓋追隨暇
款語蟬聯月榭留

五載承明厠
直廬說經殊愧久
尋虛新知但得從容領
超詣真同縹緲居
安穩生涯惟有宅
料量家具莫如書
茲辰幸許兼規頌
涓吉無勞問建除

聽車行戲示兩兒

遠聽車轆轤到門喧剝啄我僕持兒書壓載滿囊襍白
竊太倉儲飽粟輕侏儒況與馬成二可乏豆與芻豆芻
尙不饜佐以麥屑名曰糝郊居日日仰支給運饌有期
期十廿我兒能發我能收一一稱量俱平聲好收拾困簾

少甕盎多蓋藏頗完密黠鼠那得容其窠獨有草囊怕
傾倒占地須知疊來少却如僵臥肥短人未妨榻畔縱
橫繞豈無養和助不減雙玉餅豈無佐餐費不減萬選
青酌酒緩覓淳于斗數錢且學河間手試看廐閣盡充
盈但覺鬚眉慙塵垢奚童捫擋背面嗤傳聞劬舍多微
詞老夫何至鄙如此此中深意兒當知半生衣食艱難

極負米有心殊少力當時升斗總難邀卽今顆粒猶堪
惜量入爲出古有常一鬴二鬴計口償王政還應究纖
悉居家詎可無周防壯哉雀鼠度偏勝正恐漏卮從此
盛擬將婉諷愧頑奴家法何緣資檢正古來豪貴矜豪
奢布帛菽粟同泥沙主人不問問臧獲繁華照眼皆空
花儉以養廉渾不解貪以敗官常不改餘殃轉益子孫
癡癡種都因太瀟灑我今未暇求田宅借此習勞同運
甕屋子終無塞破嫌位置齋中看履屐誰能馭下廢疑
猜便用教兒勤綜覈所嗟流弊不能無自知莫待他人
摘一弊直爲恪專已何容更分潤一弊轉爲貪物重彌

形彼可耽一弊溺爲俗田舍蚩蚩真自足此弊乃翁嘗
有不予爲父隱吾其憂作詩示兒還自笑心清跡濁曷
以見亮於朋儔但當我自用我法却後半月約車仍汝
求車來仍以前法收

謝金圖壩編修招同人小集

嬉春四集各有詩衆中屬和惟康樂

張陳倪王招飲四
作惟金圖辱和二

首重因銷夏飲君家肯學啞蟬偷避雀麥秋雨足趁新

涼面面文窗開水閣不須蕉扇助交揮但喜荷簫供滿

酌怪他珍饌盡南烹自有廚娘非外索祇愁食禁偶嫌

疑頓遣老饕遭束縛

時王瓜長
生果並設

令徵前事不足道酒有

別腸何處著應知酣暢主賓同玉雪兒郎詠佳作

賢郎十歲

自誦

新詩丹山萬里繼清聲小謝高名真不忤當筵相顧引

詩興鰕生攘臂神先躍前時次道品家釀禮飲雍容翻

索莫壽觴補向補亭開祝嘏俗詞都屏却

何閣學觀少司馬兩集俱

未有

雖非金谷有嚴例兩度寂然終闕略今來詩料最

鮮新靈根巧濬詞源涸牽連已事作波瀾藉以補遺殊

不惡東山教兒聞善頌好句寧能廢酬酢移尊明日就

行廚

翌日承代余治具款諸公

幸報瓊瑤無宿諾

邀諸公小集金圃寓率詠求和

醉君酒飽君德詩以報之真兩得飲我酒投我詩惠而

好我誰先施會開酌酒須導飲詩亦宜然計已審不然
飲罷豈無歸雅詠還看付高枕由來嘉旨嘉賓誇主人
遜辭烹飪差我今暫趁謝庭集自譽不損謙不加莫言
食作前日味九變鼎中參九沸廚爨巧供幾分簽座客
爭籌一金費

諸公擬
訂後局

久知縱飲堪消暑排日開筵意飛

舞祇愁未到醉如泥執熱依然氣如縷車聲當晝常隆
隆側聽乃在煙霄中西山潑墨掩晴翠橫空雨脚隨長
風今年麥稔雨已足棲畝黃雲怕蒸溽我曹況少漏油
衣天公斟酌從人欲輕雷送雨向山外賸有風師忘偃
旆興酣乍喜共披襟衣薄頓教重結帶此天真是酒人

天大斗傾來赴壑泉縱乏報章爲我贈那無佳句頌天
緣眼前便請搜詩料姑許巴人作同調慣將堅壁老吾
師正恐窺人有年少

時金圃長君在座

銀臺陳句山

兆崙

前輩招同人小集

曾聞有酒歎無肴我恨嘉肴逢惡酒孟公尺牘訂開筵
有一先生號烏有癡客翻憐贈一甌薄命偏隨督郵走
犯嚴黽勉作歸謀和旨幸堪調衆口此中得失主賓同
那不懽然斟大斗半間自啓鍊珍堂況有族庖相左右
金齏玉鱠足清腴一簋豈惟兼貳缶炎天難趁水風涼
却喜曲池環北牖指揮健僕徹屏障在來頗似東平守

從容觴詠自移情醉態不臧嗟已久不愁丞相按歌呼

隔牆即諸城相公第怕比將軍嗤腹負向年曾以號呶宰汪文端公寄謔云昨豈酌俺答

耶張拳列陣陣而囂伏豹何容露蹠風悄從杯底試尋

花得雋尙嫌時拍手我曹酣法定何如放浪其常謹其

偶安居共羨卜鄰晏偏處莫憂分宅廊借同監史攝威

儀勝遣箴規誦矇眵水亭面勢更相當鳴鏑清心常聽

取孝先此會獨高眠他日招邀應記否邊秋厓侍讀北軒正對劉第相

公嘗以水亭號箭爲謔秋厓是日不至按次亦當招飲故云太邱道廣斷猜嫌笑我

枝辭類駢拇但欣家釀剩空尊何假吟箋供覆瓿

學士周海山煌前輩招同人小集同年顧密齋汝

修少廷尉適至翌日周遷閣學率詠呈賀

退直高枕便

平

疎慵打門常怕驚周公周公述經辨醢

醢代庖遠覓良庖供食指頻搖倦眼豁延緣葦岸欣過

從解衣槃薄踞連榻曲檻左右迎交風主人未舉客已

醢嘉肴遲

去

御殊喁喁初筵親饋詫珍饌十手對面爭

先空爵行無算此其始客來不速參於中避嫌肯作向

隅坐既飽暫學辟穀翁未妨觴政預奇策寧借壁觀誇

勇功談諧無間但不飲令人却憶劉公榮

叶

諸君相與

共冰署齊年唯我追雲龍主人況是舊鄉里淵雲並世

稱詞宗後先拜賜一品服橫轢象郡凌蛟官

顧方使安南周前使

疏使星轉從益部出井絡氣象增豪雄座中屬目蚤神

動應有新寵傳泥封飛龜幻語豈方貢

介少宗伯談嵩茂承壽前輩使

安南時所見

巢鳳健翮還高舛斜陽遠嶺送餘照嚮晨前殿

瞻重瞳講帷猶認玉堂客簡命遘晉綸扉崇定知昨

夕企風采人望自與天心通頓教彥會比前盛別添詩

料貽我豐開尊幸已多且旨酬客諒可因而重更憑公

瑾語元歎兩家燕賀將毋同

邊秋厓

繼祖

侍讀招同人小集

孝先拄腹元便便却笑老饕飢火煎開尊記避水亭譴
洗琰暫須尋樂泉樂泉香染墨池潤逸少共喜邀羣賢

移席晉川廷尉竹溪書
屋實樂泉副憲舊居

衝泥徐蹶舊移石貼水略餘新

種蓮光陰傳舍半年換對此不飲殊可憐牆頭詎假濁

醪助竹裏還待行廚遷

庖人復寄別室

主人治具亦良苦淫雨

何忍長不漑蓋君後至勿多酌先聲幸不虛乘軒

海山閣學

後至或預傳
肩輿出郊

朋簪十二乃全聚填壓閨位非空懸

同直十三

人樂泉奉使今
全集其舊寓

談鋒觴政鬪奇捷儻續世說真堪傳

諸公

言語妙天下敬堂少僕
常謂應錄成績世說

憑欄長嘯吐逸氣風迴雨歇波

紋旋荒池戢戢葑根結游菰泛泛浮槎環曾聞魚背擁

草樹平移孤嶼臨重淵不然便縮海圖本幻出風引三

神山不繫之舟有時繫常住彼岸誰攀援

有茭草一聚如數間屋蟠

根浮水因風往來延尉慮其
侵壓荷花以五絙牽著南岸
土山南畔倚宮道車殆馬

煩勤著鞭定知隔水望吾輩縹緲何減瀛洲仙不圖飲
罷促歸去仙人行復棲塵寰清歡一餉亦云足池面聊
看浮漚圓水亭却想轉清寂明日正宜當晝眠

容齋二筆載陳後主集有每詩各賦韻十字者數
十篇舉三篇爲例謂今人無此格也余謂限韻
固繁正如作次韻詩耳時生日將近避喧斗室
卽用其韻漫詠三首

征馬暫依槽蹀躞氣偏盛天許息勞筋我方憂懶病清
談殊少味挂壁冷犀柄覓句遣閒心賦韻舉前令一字

靜廉齋詩集

卷七

三

限非苛十全誇作橫側想擘箋時繞座瓊枝映但解溯
風流未須阻愁負學步或難工累基良可併蕭灑對秋
窗墨瀋涵幽鏡假日總無虛濡毫先自慶

軒窗本虛敞卷軸互排迤十笏小庭寬草樹交枝格點
綴喜秋花翻階銜紅白幸當積雨收寧復驕陽赫靜境
閱炎涼妙參無體易蠅營警其朝蚊聚迫其夕見見亦
聞聞鋤金底須擲西風晚方勁節序暗推斥曳杖劃苔
紋徐看幾爻坼兒女笑翁癡隔簾聲啞啞

笑癡故有因屈指翁生日煖熱豈不佳翻嫌損清謐棣
萼本連藜荆枝僅遺一唯當薦魚叔何乃奏竿瑟塵緣

共牽帥不減鳥投畢嘉月數中秋冰輪裝未訖連朝挽
鬚問似欲進懷橘指使亦殊煩毋爲屢相質避俗寄清
吟拈題繙舊帙追和本無奇次韻抑其實

九日城南紀游

從游者汪編修存寬譚檢討世嗽何檢討日珮袁舍人文邵胡庶常

魁元及季兒三俊

九日陶然亭登高成俗例昨歲憶游蹤寒裳曾蚤避城
南有花鴈采菊喜同志蕭爽領秋光車中愁閉置諸子
任均茵老夫聊緩轡穿林傍藁葦沮洳勝膏膩蹄蹙未
爲傷輪埋不堪曳途窮寧哭阮興盡猶訪戴遄歸度城
闕悵悵迷所詣樹杪蠹雙標飛螢迭虧蔽無意到仙宮

斗杓闕象緯氣母萬靈朝高居森羽衛初登入幽隧塏
戶螺旋細宛轉陟三層曠朗乃無際週遭大圓鏡空界
混蒼翠西笑認修眉三垂總平地萬籟自常喧聞根茲
暫閉丹梯難久駐歷歷披雲墜恟恍出壺中髣髴倚天
外失路復何嫌勝賞幸仍遂應知離俗舉常苦拂人意
記興必超凡探奇豈終閤會心初不遠講學驗游戲還
經崇真殿更入憫忠寺樓閣頗崢嶸評量殊自鄮望眼
已無遮逸足莫頻試布地得黃金菊藥駢枝綴故事了
重陽莢觴能惜費藉以息勞筋蕭齋謀一醉此樂去年
同此境明年異

余明年輪
值隨園

懷遠塞山橫互寄相思字

題之錦贈言冊

同年龔儀部介夫廉令祖節孫翁望先生初任錦州別駕時諸名士

贈送之作

十三山列地圖雄半刺還推渤海龔風月平分供坐嘯
百城南面自雍容去時廣購書籍捆載以行

名流惜別共徘徊科第何嫌讓鼎台屈指河汾門下士

一時將相總儲才

溧陽相國及故皖撫納敏皆嘗受業納撫吳時曾爲立祠

展驥休嗟困短轅桐材空老正宜孫琴臺近接容臺峻
治譜流傳信有源

曾開續祖驗書香蠹簡同分翰墨光投老滇黔清白吏

兩家子弟尙聯行

公遷牧貴州平遠先祖亦嘗知雲南師宗州事

同年羅旭莊

暹春

編修訂踐食蟹之約歸來殊苦

腹疾尋又與給諫陳雪園

作梅

同年同日見招

已諾雪園無以塞旭莊意也作此謝之

厚施了無報何異雀鼠盜過飲悔彌深猶記武公耄前
宵忘爾雅腹疾下殊暴老饕暫齮舌議饌擬夷竈折簡
迭招邀兒女燈前譟誰能斷來往漫與計盈耗齊年舉
觴屬並足寫襟抱流湏或堪嫌契闊應相勞正使飲偏
酣莫訝跡如埽去就本無心隨風等懸纛

何縉華檢討用前韻密招兩兒飲余越日始知疊

韻示何並做兒輩

兩兒癡點半藥酒頗能盜公然就人飲殆謂我言耄自
愧覺偏遲無緣發之暴君欲請比鄰撫時非祭竈韻語
暗招邀襲攻不鼓譟指木教孫升踊躍喜聞耗潛伺老
夫行乞憐慈母抱於君良損惠未敢以詞勞姑息愛應
蠲筆陣勉催埽庶返酒星魂同奪文場纛

張有堂同年有詩寄懷同直次其試院三松韻答
之

深秋邂逅天街東小別已復踰初冬雲林慣聚好書帖
詩筒印坼傳新封來詩從倪少僕得之樂泉揮弄迸珠玉格律遵
上山龍從文衡精審轉清暇檢點老伴餘三松我雖未

獲睹鱗甲五鬣應比君鬚茸濤聲殷空捲蒼雪勢與秀
句爭鬱蔥指端拂拂興不淺似寫羽蓋迎青童爾時鎖
院尙警櫟諸生鵠立方環墉豈知餘事足瀟灑束笋蚤
隨漂蕩風大夫何必領高爵老子端合稱猶龍寄將舊
雨慰離索使節喜得覘行蹤濡毫遠想樂翁樂

來詩有
細數源

頭是樂
翁句

戴星迴憶同人同馬蹄特特塞山碧雞聲喔喔

燈窗紅流行坎止偶殊趣鴻毛風舉將安窮懷人長嘯
和松籟金石震響羞琤鏦吟餘如接悄然色我輩信有
深情鍾瓊瑤辱贈不知報山石殊愧供磨礱挽強文陣
勝牛弩蒿箭詎堪張柳弓新栽頓欲擬千尺聊借快語

開心胸還因祝慶趁朝集官縣同聽鳴黃鐘

臘日感興用坡公游孤山訪二僧韻

身魏闕心江湖歲時伏臘家有無鄉關彈指候清蹕

壬午正月十二日大駕南巡入直長聽雞人呼此日徑歸對妻孥

筵久輟琴書娛裁叩天門風引退隨車縞帶徒縈紆若
教不飲守空廬縱有骨肉同羈孤開尊何待喚隔屋買
魚頗似新依蒲一日蕭灑真仙夫桑榆顧影愁向晡幽
齋客斷徑不埽謬欲粧點臥雪圖授經短晷爭三餘峭
直愧史婉愧遽偷閒自適祇積逋箇中憂樂誰能摹

靜庵

卷七終